



O Volapükaf lens valöpo!

Dönu dekul ekömon ko prim säsuma lunüpi zälas. Ayelo demü mesüls mödik karantenik da vol lölik mödikans vilons-la zelön nosi, ab vilons-la bleibön vobön, too mutoy bemastön oki e belifön vakenüpi ön fred ladöfik. Ye Volapükans bo okanons fredön dö zäladels, bi olabons mögi legudik ad fulükön livüpi me stud ai plitik Volapüka.

Suemob, das reidans mödikün gaseda obsik cedons deli teldeglulid dekula däti kritidazäla, ab dil ömik menefa jünü bleibon gebön kaledi evönädiköl di ‚Julius‘ e zelon kritidi tü del velid yanula, sevabo pos zel pötü nulayel. Atos tefon lekredanis e kultanis glüga Rusänik lotodogik, klu in Rusän del ebo velid yanula binon calöfiko zeladel pötü kritidazäl. Sekü atos Rusänans anik, kels jenöfo no lekredons Godi, kösömons ad zelön alyeliko kritidazäli telna, efe ma бүдүлс e katulima, e verätalekreda lofüdänik. Nutimo krit süükon pubodis vemo bisarikis pö sogäd.

Bisar nog votik tefon nulayeli in Rusän. Kaled di ‚Julius‘ pefinidon us te ün 1918 (ma ditretabүдүл boljevanas), e memot dö kaled бүик nog dabinson bevü Rusänans, mödikans kelanas zelons deli degfolid yanula (sevabo neiti vü del degkilid e degfolid) asä nulayeli vönädik (ma tradut vödik: „nulayel bäldik“, Linglänapükö: ‚Old New Year‘). Notodot at kofudükon foginänanis, zuo yanul 14 calöfiko binon vobadel kösömik.

Alo fütür oblinonös valanes gudikünosi! Demü kritidazäl e nulayel kömöls vipom reidanes zälaladälodi voik redakan:

Daniil Morozov

Konot leplik.

*Fa ,Frank Roger'; tiäd rigik: ,Monkey Business';
tradutod Volapükik fa ,Hermann Philipps'.*

DIL TELID.

„Si! Ab cifob büsidi, e binos dämabik ad mosedön dunetäbi, kel labon moni ad remön utosi, keli desiron, igo ven dunetäb somik fädo binon lep. Anans ai no ye äkanons suemön atosì.”

„E vilagacifodans-li? Ästütöns-li oli?”

Man änoom mäpeto osi. Smilil inepubon de logod oma; änotos, das atos äbinon dinäd, kel ibiedälükom omi boso.

„Vilagacifodans ästütöns pluamanumi vilaganas, kel ävilon, das öfinükoböd seli oba lepes. Ai dönu äplänob, das äviodob loni nonik ni ädämob seimani, ab no ädemons blöfädi obik. Seimna lumans zao degtels boso pöfiks äfögoms bali dunetäbas leplik oba, ed ätädoms ad fefilükön selidöpi obik, if no ögudikumob. E cifodans no ävüjäfükons okis, ab äleadons jenön atosì. Äkleilos, ad palet kinik äklienons. Kludo älabob väli te bali. Ömutob refudön „dunetäbis patik” oba. Neföro älogob dönu onis, ibä pämo~~f~~ugons alna, kü äkünons ad kömön se fot. Fümob, das neföro ogekömons isio. Kisi nu du~~n~~ons-li me mon onsik? Ba egolons votöpio ad duinön plösenis oksik, ad nükobükön moni e ad dunön nüremis; no sevobs osi. Füm~~o~~s ye, das lepabüsid no plu ojenon in ,Urumbatti’.”

Dunetäbs anik votik änükömons ini selidöp, klu hiel Tarquini ädanom mani pro tim oma, ed ämogolom. Ägoulom zi in vilag, ed ädrinom bovületi kafa, jüs äkanom gevegön me nibud lü ,Jalafreen’: zif, kö älödom in lotidöp.

Ün soar ot hiel Tarquini ädrinom väreti bira in ,bar’ lotidöpa. Äbetikom leliviko utosi, keli itüvom. Tänä lotedan votik äbe~~s~~eidom stuli di ,bar’ näi om, äbonedom väreti bira ed äpladom yegi bisarik foi ok. Äbinon sotül skultura boadik, vemo grobik leigoäs prodot cila, kel isteifülön neskiliko ad ködön magedi

XII:103:2020

menik se boadadiled. Oni ästudom, ägüflekom e kälöfiko ägepladom. Äküpölo logedi nitedälik hielä Tarquini, äsäkom:

„Sevol-li, kö egetob ati? No okredol osi, o flen!”

„Alo sagolös osi obel!” hiel Tarquini ägesagom.

„Aposzedelo edunob flumedatävüli. Ven naf obsik äjolon, leps anik äkomons lä jolamöp ed äselons lekanotis somik. Jenöfiko ons it mekons dinis at. Äjonoy obes lepis anik, kels äbevobons ködölo boadi me stums döfik. No sevob, lio idagetons tiketi at, u tiketi ad selön prodotis oksik. E – no kredolla osi – leps at älabons moni. Älabons völadis distik, igo dolaris Lamerikänik e yurodis. Ärefudons bankazöti pülik fa ob peloföli, ed ägegivons obe lukönädamoni, posä ilovegivob ones bankazöti plu völadöli. Äsebons vali, kel äzesüdos. E leps at äpöjutons törani alik, keli itüvons. Jinos binön nekredovik. No kredol obi, vo-li? Benö! gololöd e logolöd ito, o flenädan! E remolöd bali lekanotas lepik at, dü nog binons nejeriks. Skultur at igo ba obinon spekulot mu süperik, o flen!” Man äsplodülom me smil. Täno älüälükom küpäli oka lü biliar, keli pösods anik äpledons nedetü om.

„Dido nekredovik”, hiel Tarquini ävispom, dü lülogom voboti „lekanik” grobik. Ätikom, das is in vilag leps niludo iküpedons boadiködanis. E das ikludons, das atos öbinon-la pöt pro ons ad meritön moni. Ätävons tikamagoti teda, e vifiko ädafomons siti jäfidöl. E ba atos binon te tridäd balid volfa, kel odugon lepa-sogädi älä lüod no pespetöl. Lio atos ofinikon-li? Disinät onsik dö sogädakonöm stabü ted e dö sit kosäda monik odugon-li ve vegams leigik, äsä ve uts dabinanas menik? Odabinons-li suno leps liegik ed i püliks? Odabinons-li sogäts stabü monem pukumöl e nämädam dub ot? Leps anik otifons-li moni de votans? Anans igo osasenons-li votanis demü mon? Oda-binons-li leps moniälik ä lavariks, ed uts, kels ofegebons moni oksik nespälölo? Mon e valikos, kel sekon de on, ovotükon-li löliko sogädi lepik, e fino oseasleiton-li oni, sümo äsä äjenon tefü sogäd menik? Logobs-li me atos primi volfa stunüköl, u bümali lügadramata vemik?

XII:104:2020

Hiel Tarquini älemufükom kapi oka. Man nai om abonedom väreti bira nog bali, ed ägivom bötane bankazötis anik. Pö atos nendesino äjoikom donio skulturi boadik. Hiel Tarquini oni äfanädom, büä äkanon falön sui glun, ed ästudom oni. Dido skultur at äbinon vemo grobik e leno jönük ön sinif seimik vöda ot. Luveratiko pimekon nen desin lekanik seimik, ab te as yeg selidik. Ab leigoäsä man isagom, ämögös, das atos äbinon spekulot mu süperik. Ätikom, das ba sötom remön skulturi de man at. Ekö! Ägidetom. Völad ona ya ägretikumon... ■

NOTODOTS NITEDIK.

stul di ‚bar‘ = ‚barstool‘

yurod = ‚euro‘.

DOG ELAS ,BASKERVILLES‘.

*Fa hiel ‚Arthur Conan Doyle‘. Petradutöl fa hiel ‚Oleg Temerov‘.
Tradutod papübon bai koräkots pülik fa hiel ‚Daniil Morozov‘.*

Kapit telid (dil kilid).

„Täno, o söl: ‚Holmes‘! oleblünob ole bosu brefobüikum. Atos binon el „Kronig grafäna: ‚Devon‘ ” dätü d. 14^{id} yunula ayelik. Ekö! nunod brefik dö jenöfots pedatuvülöl tefü deadam söla: ‚Charles Baskerville‘, kelos ejenon bü dels nemödik.”

Flen obik äbiegädom bosu föfio, e logod omik ävedon küpälik. Visitan obsik ägepladom lüni okik ed äprimom:

„Deadam süpik brefobüik at söla: ‚Charles Baskerville‘, hikel pämaniotom as steifädan luveratik flanaü palet liberimik pö ziläk: ‚Mid-Devon‘ < ünü daväl balidkömö, evedükon grafänanefi glumiki. Do söl: ‚Charles‘ < älödom pö ‚Baskerville Hall‘ dü tim tefädiko brefik, flenöf e giviäl tuvemiks omiks äsenälükons löfili e lestümi valikanes, kels äkosäbons ko om. Nutimo, ven parvenans¹⁾ mödik davedons, trodos ad tuvön

XII:105:2020

jeneti, kö sprotan se dafamül vönik grafänik, lü kel
dels badik ädutülons, ekanom jafädön liegi lönik e
geblinön me atos geiläti tribüte ifailöl okik. Söl:
,Charles', äsä sevoy veitiko, äjafidom moni gretik me
spekulots põ Sulüda=Frikop. Äbinölo visedikum ka
utans, kels fövons jüs fätaluib ogütulon ta ons,
egebidöfükum getotis ed egetävom ini Linglän kobü
ons. Yels te tels epasetikons, sisä ifimalödikum põ
,Baskerville Hall', ab sagäd ya espearikon valöpo,
disins kiogretik omik tefü dönustuk e gudükumam
länilabota äbinons, kels peropons sekü deadam omik.
Ito äbinölo nencilik, notodälo änotodom desiri, dat
länädanef lölik öfrutidon benofäti omik dü lifüp lölöfik
omik, e mödikans labons kodi pösodik ad belügön
deadami süpik omik. Legivots nobaladälik omik noga
nes benodälik topik e grafänikes suvo pämäniotons põ
padüls at.

Dinäds deadami söla: ,Charles' < teföls no kanons
pacedön as pedaseivöl löliko fa vestig, ab nemu sa
gäds ut pemoükons, kelis lukredans topik äpakons.
Kods go noniks dabinons ad niludön desini badik u
tikodön, das deadam at ekanon pakodön fa bos nena
tik. Söl: ,Charles' < äbinom viudan e man labü lüälä
stad bo bisarik. To lieg vemik okik, äbinom men nefla
giälik tefü neodots lönik, e domadünanef omik põ
,Baskerville Hall' pämiedöfükon ad matanapär famü
lanemü ,Barrymore': himatan voböl as domadünan e
jimatan as konöman. Temunod onas, ko temunods
flenas ömik ebaibinöl, lüodükon ad utos, das saun
söla: ,Charles' < ebadikumon ünü tim lätik, e kazeton
ladamalädi seimik, äjonöl oki dub cens täina, brefa
natemam, e glepäds japälik glumaladäla. Dokan:
,James Mortimer': flen e kevoban sanavik edeadölana,
etemunom otosi.

XII:106:2020

Jenöfots tefü jenot binons balugiks. Söl: ‚Charles Baskerville’ < äkösömom ad donioŝpatön ve lael taxudik famik ela ‚Baskerville Hall’ alneitiko büä ögoŝlom ad slipön. Els ‚Barrymores’ ätemunons, das atos äbinon kösömot omik. Tü d. 4^{id} yunula söl: ‚Charles’ < ilesagom desini okik ad detävön lü ‚London’ ed ibüeŝdom blümükön hiel ‚Barrymore’ päkemi omik. Ün neit et kösömiko isegolom ad spat neitik omik, ünü kel i kösömo äsmökom zigari. No plu ägegolom. Tü düp degŝtelid ‚Barrymore’, iküpölo, das yan föfalecema ai nog äbinon maifik, ämuifikom ed, ifilidölo lantäri, ädegoŝlom ad suk söla okik. Del äbinon luimik, klu futanüpedots söla: ‚Charles’ < kleiliko äzugons donio ve lael. Pö vegäd lafik donio us yan zugöl plödio äl mar ädäbinon. Us jonäds äkomädons, das söl: ‚Charles’ < istanonom lä yan dü tim seimik nemödik. Pas täno ädönuföŝvom vegami ve lael, bi koap omik pituvon finotü veg. Jenöfot bal no peplänon: lesag hiel ‚Barrymore’, das figur futanüpedotas söla omik ävotikon, sisä ibeigolom yani äl mar, e jiniko älaifövom vegami su tipots futasoka. Zigan seimik: ‚Murphy’: jevodaŝtedan < äkomom pö mar ön fagot no gretik ettimo, ab bai koefot lönik omik äbinom ön stad miik demü briet. Elesagom, das älelilom vokädis, ab no äfägom ad fümükön lüodi dese kel ätonons. Mals nonik mekädama petuvons pö koap söla: ‚Charles’, e do cödöt sanavana äjonon mitiri logoda ad stad ti nesevädovik (mitir sovemik, das dokan: ‚Mortimer’ < primo änezepom ad kredön, das äseatölan fo om sio äbinom flen e dunetäb sanavik omik), atos pikodidon sümptome, kel no binon plödakösömik pö brefanatemam e deadam sekü dafenükam ladik. Plän at peblöfon medü funileköt, kel ejonon malädi jäfidämik lunüpik, e büvestigacödalef elonülön sludi bai cöŝdot sanavik.

[*Setem at finikon su pad: 108.*]

PLIN SMALIK.

Kapit: 7 (2).

„Sevob planeti seimik, kö dabinom söl karmesinakölik. Neföro äsmeilom flori. Neföro älülogom steli. Neföro älelöfom eki. Neföro ädunom seimosi plä saedam. E dü del lölik dönuom, äsä ol: „Binob men fefik! Binob men fefik!“, kelos koedon svelikön omi ön pleid. Ye utan no binon men, binon garid!”

„Kin binon-li?”

„Binon garid!”

Plin smalik löliko ipaelikom sekü zun.

„Ya balionats yelas epasetikons, dü kels flors sprötons spinis. I ya balionats yelas epasetikons, dü kels jips to mesüls at fidons floris. E no binos-li fefik ad sukön tuvedoti, kikodo flors sovemo letöbidons me prodam spinas, kels neai frutons bosì? No binon-li din veütik krig jipas ta flors? Dins at üfo no binons-li fefikums e veütikums, ka saedams söla karmesinakölik bigik? E ba sevob flori ut balik in leval lölik, kel dabinson neseimo pläamo su planet obik, e flori kelik jip smalik okanon nosükön pos steifül balid; okanon nosükön vemo fasilo ün göd seimik nes suemön dämi ut, keli oblinädon. Dins et üfo no binons-li veütiks?”

Posä iredikom, äfövom:

„If lelöfoy flori, te samäd bal kela dabinson pro balionats e balionats stelas, tån lelogam onas saidon ad vedükön oyi frediki. Spikoy ninälo oke: „Flor obik binon us seimöpo...” Ab if jip efefidonöv flori, binosöv pö oy, äsif süpo stels valik ekvānikons-la! Ed atos töbo leno binon-la veütik!”



XII:108:2020

No plu äkanom fovön. Süpo äsplodülom me drens. Neit ipri= mon. Ileadob seatön stumis oba. Fög obik, skrub obik, soaf e de= ad nu äjinons lü ob binön smilöfapüliks. Te ädabinom su stel, su planet, su tal obik plin smalik, kel äsötom patrodön. Älösumob omi me brads oba. Äklädob omi in brads. Äsagob ome: „Flor, keli lelöfol, no binon in riskäd... Tefü jip olik: odäsinob pro on musu= li... Odäsinob pro flor olik kiudi... Ob...” No äsevob kuratiko utosi, kelosi nog ökanob sagön ome. Älecedob obi vemo neskiliki. No äsevob, vio ökanob koedön reafön vödis obik lü om, vio ökanob dagetön kosami ko om... O! kioklänöfik binon län drenas!

Fövot osökon ün yel: 2021.

FÖVOT DE PAD: 106.

Atos binon gudik, bi klülo mu veütos, das geran söla: ‚Charles’ < ulomädükonös oki ini ‚Hall’ ed ofövonös vobi gudik, kel peropon so lügiko. Üf kludod prosadik büvestigacödalefa no ifinükonöv fifümiko konotis romatik, kels päluspikons tefü jenet, täno bo äfikulo= söv ad tuvön dalabotani ela ‚Baskerville Hall’. Sevedikoy, das röletan nilikün binom hisiör: ‚Henry Baskerville’, stipä nog binom lifik, sevabo son bloda yunikum söla: ‚Charles Baskerville’. Man yunik, bai nün lätik, äbinom pö Lamerikän e seivids pekomitons ad nunädön utane benofäti omik.”

Dokan: ‚Mortimer’ < äge=plifom gasedi okik ed äge=pladom oni ini pok okik.

„Ats binons jenöfots notidik, o hisiör: ‚Holmes’! tefü deadam söla: ‚Charles Baskerville’.”

Küpet.

1) Parvenans, sevabo is: els ‚nouveaux riches’.

Fövot ofovon.